

بِسْمِ اللَّهِ الرَّحْمَنِ الرَّحِيمِ



## Khutba Jummah

Hazrat Khalifatullah Muir. A. Azim (atba)

29 Mai 2020

06 Shawwal 1441 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lors :

### Bane Attributs d'Allah (Pt.6)

C'est purement par la grâce d'Allah ki mo pé continuer faire mo série Khutba lors bane attributs d'Allah [6<sup>ème</sup> partie] et pour cite quelques attributs d'Allah avec certaines explications.

**Al-Hafeez:** *Al-Hafeez* c'est ene attribut d'Allah ki sorti à partir du mot *Hifz* ki veut dire protection. Donc, *Al-Hafeez* veut dire Le Protecteur. Péna nannié dans l'existence ki capave accorde protection tous les temps et dans tous situations parski sa li nécessite ene connaissance ki couvert et englobe sak atome ki exister et ene capacité absolue.

Péna nannié ki possède sa ; donc c'est nek Allah Ta'ala Li tout seul ki So connaissance li ene connaissance ki couvert tout. Péna nannié ki échappe So connaissance. Et c'est nek Allah Ta'ala Li tout seul ki ena capacité lors tout kitchoses. Péna nannié ki capave ranne Allah Ta'ala incapable. Donc, c'est nek Allah Ta'ala Li tout seul ki *Al-Hafeez*. Allah Ta'ala Li conne sak créature kot li été et dans ki situation li été. Li conner ki sanlà li bizin et ki quantité li bizin. Et Li ena capacité accorde li céki li bizin. Péna nannié ki capave vine ene obstacle pour Allah Ta'ala. Récite sa attribut là en abondance et invoque Allah Ta'ala par sa, li ene

moyen bien efficace pou développe confiance dans Allah Ta'ala. Li ene moyen pou ene dimoune ki li dans détresse et dans la peine, li senti li protéger en céki concerne so la vie, so la famille, so dibien, so dignité et so l'honneur.

**Al-Hakeem:** *Hakeem* li derive de *Hikmah*. *Hikmah* veut dire la sagesse, la maîtrise et la perfection. Péna nannié ki parfait ; c'est nek Allah Ta'ala tout seul ki parfait. Allah Ta'ala So travail li dépasse tout maîtrise et Li au-delà de tout expertise. Acause sa dans le vrai sense du mot, c'est Allah Ta'ala Li tout seul ki *Al-Hakeem*. C'est à cause ki Allah Ta'ala So connaissance li parfait. So travail li parfait. C'est Li même ki fine façonne sak atome l'univers dans ene forme et ene dimension équilibré et approprié.

Si nous prend sa dépi verbe *Hakama* ki veut dire gouverner, alors à ce moment là li pou signifie ki tout l'autorité li trouve dans la main Allah Ta'ala. So décision li finale. Personne pas capave objecter/ casse So décision. Ni kikaine capave surpasse Allah Ta'ala dans So pouvoir et So l'autorité.

Kan le mot *Hakeem* li attribué à ene l'autre apart Allah Ta'ala, alors li signifie ene [dimoune] ki ena ene connaissance de *Deen* et ki so comportement li basé lors connaissance ki li ena. C'est-à-dire ene ki so comportement li pas trahir so connaissance ki basé et fonder lors bane principes établie et solide.

Méditation lors sa attribut là faire ene dimoune soumette totalement divant décision Allah Ta'ala. À noter ki sa soumission là pas empêche ene dimoune dimane *duahs* mais céki essentiel c'est ki nous laisse la décision finale à Allah Ta'ala et nous satisfait avec céki arrive nous après ki nous fine faire *duahs*.

**Al-Kabeer:** *Kabeer* veut dire grand. Nous appelle Allah Ta'ala *Al-Kabeer* parski tout grandeur appartenir à Li même. Péna nannié pli grand ki Allah Ta'ala. Li même pli grand. Sa nous dire sa seulement pou gagne ene l'idée. Sinon péna nannié ki capave comparer avec Allah Ta'ala. Li incomparable et Li grand dans tous bane aspects ; Li éternel. Tout kitchose à part Li, zot pou périr, c'est-à-dire, nannié pas ti exister. Allah Ta'ala fine accorde tout kitchose l'existence.

Apart Allah Ta'ala tout kitchose capave arrête exister. Li péna nannié dans Li ki capave qualifier de manquement ou de mauvais. Le fait même ki Allah Ta'ala Li éternel suffit pou montrer ki Li au-delà de tout et Li surpasse tout. Li contrôle tout

et Li ena pouvoir lors tous kitchoses. Ene dimoune ki ena *Imaan* lors Allah *Al-Kabeer* pour toujours faire en sorte ki li pas commette nannié ki indigne. Li pou toujours senti li en sécurité avec Allah Ta'ala. Li pou toujours connecter avec Allah *Al-Kabeer*. Zamais li pou tombe dans la bassesse. Pli li méditer lors *Al-Kabeer*, pli sa ranne li confiant, humble, doux, et affectionner.

**Al-Mujeeb:** Allah Ta'ala Li *Al-Mujeeb*, c'est-à-dire li réponde l'appel de So bane serviteurs. Li accepter *duahs* de bane ki faire *duahs*. Li écoute doléances de bane ki dans la peine et vine à zot secours. Dans zot bane difficultés Li soulage bane ki dans problèmes.

Allah Ta'ala dire: « **Et kan Mo bane serviteurs dimane toi à propos de Moi, alors (faire zot conner) ki Mo près (avec zot). Mo reponde l'appel de tout celui ki invoque (Moi) dans sa moment kan li invoque Moi là.** » (Al-Baqara 2 : 187).

Allah Ta'ala fine promette dans sa verset là pour réponde l'appel de tous bane ki étale la main pour demande Li. Li pas retourne kikaine la main vide. Donc faudé pas ene dimoune hésiter pou demander kan li dans nécessité et dans le besoin. La porte Allah Ta'ala li reste ouvert 24 lors 24.

Ene dimoune li capave dimane Allah Ta'ala l'heure ki li envie et l'heure ki li content. Ene dimoune ki médite lors attribut de *Al-Mujeeb* pou toujours ena l'espoir. Zamais li pou décourager avec bane moments difficiles parski li conner ki Allah Ta'ala *Al-Mujeeb* ; Li toujours là pou écoute li et aide li. Li pas tout seul kan même li trouve li délaissé dans ene désert sans provisions et sans support. Allah Ta'ala *Al-Mujeeb* Li présent et So la porte grand ouvert.

**Al-Waasi:** *Waasi* veut dire large. Kan nous dire sa pou Allah Ta'ala, sa signifie ki Allah Ta'ala Li au-delà de toute dimension. Allah Ta'ala So Trône li couvert lé ciel, la terre, et toute la création. Allah Ta'ala Li contrôle et Li ena l'autorité lors tout kitchose. Nannié pas en dehors So royaume. So bénédiction et So grâce li ouvert pour tous.

Nous tous bizin Allah Ta'ala. Nannié pas indépendant dans aucaine niveau par aucaine rapport de So faveur. Allah Ta'ala So connaissance li englobe sak atome de l'univers avec tous So bane détails.

Donc, Allah Ta'ala Li *Al-Waasi* parski So connaissance, So pouvoir, et So faveur péna aucaine limite. Sak attribut Allah Ta'ala li ena ene message à So bane serviteurs. Ene dimoune ki concentrer et médite lors sa attribut *Al-Waasi* là pou arriver conner ki li bizin pas désespérer dans la vie, dans aucaine situation, parski li ena ene Créateur ki ena tout céki li bizin. Li pou trouve la nécessité cherche recours à Li même [Allah] au lieu perdi lé temps ailleurs. Li pou trouve la nécessité être loyal à Allah Ta'ala. Li pou choisir Allah Ta'ala même comme so recours réel.

**Al-Wadoud:** *Wadoud* li vine à partir le mot *Woudd* ki signifie l'amour, l'amitié, et l'affection. Donc, *Wadoud* veut dire ene [être] ki ena sa kalité là par excellence. Nous appelle Allah Ta'ala *Al-Wadoud* parski Allah Ta'ala Li content So bane serviteurs plisse ki ene maman content so ti bébé ki pé encore boire avec li. Sa l'amitié là, li vine encore plisse pour bane serviteurs ki vive dans l'obéissance Allah Ta'ala et ki sincère envers Li. Allah Ta'ala Li *Al-Wadoud* parski So l'amitié li sans limite. C'est Li même l'origine et la source de l'amitié ki trouve dans tous so bane formes. L'amitié ki nous trouver dans l'univers c'est ene manifestation de ene particule ou ene étincelle nannié di tout de céki Allah Ta'ala possédé. Sa c'est seulement pour faire zot gagne ene l'idée. Sinon sa li pas diminuer par ene iota [pas grand différence] aussi dépi céki Allah Ta'ala possédé.

Mais bizin mette ene kitchose dans la tête ki Allah Ta'ala So *Mohabbat* li ena l'effet lors *Insaan* et ena des fois li emporter par sa. Mais sa bane kitchoses là pas arriver pour Allah Ta'ala. Li pas emporter ni influencer par kitchose. Li au-delà de tout et Li contrôle tout et partout.

Tout bane kitchoses ki mérite l'amitié pour ene certaine talent ou mérite ki trouve dans ene dimoune li vine à partir Allah Ta'ala. La source de tout bienfait c'est Allah Ta'ala. Donc Allah Ta'ala li *Al-Wadoud* parski ena tout dans Li ki attire l'affection et l'amitié. Grand la joie ki ene dimoune ressenti pou kikaine représente nannié ditout divant céki ene ressenti pou Allah Ta'ala kan li arriver commence gagne ene ti l'idée ou aperçu de *Al-Wadoud*.

Si *Insaan* capave affoler pou ene lotte *Insaan* couma li, ki pourtant li, so talent et so charme li passagère, li éphémère et temporaire, alors ki pou arrive li si li arriver ressenti impé [sa l'amitié et *Mohabbat* ] de coté Allah Ta'ala?

L'amitié pour Allah Ta'ala et So Rassool (saws) li essentiel pou *Imaan* (la foi). Bizin content Allah Ta'ala et So Rassool (saws) plisse ki tout kitchose, plisse ki maman-papa, plisse ki zenfants, plisse ki du bien et plisse ki li content li-même. L'amitié pou Allah Ta'ala li développer à partir l'obéissance pou Allah Ta'ala. C'est-à-dire pou vivre couma Allah Ta'ala ouler. Et l'obéissance li pas valable ni li acceptable tanque ki pas faire li en suivant Rassoollullah (saws). Donc *Mohabbat* pou Allah Ta'ala li trouve dans suivre Rassoollullah (saws). Pli nous suivre Rassoollullah (saws), pli nous approcher avec Allah Ta'ala, et pli nous gagne l'amitié pou Allah Ta'ala.

Ô Allah, accorde nous To *Mohabbat* et *Mohabbat* de to *Nabi* (saws) et donne nous la volonté pour suivre So *Sunnat*. [*Ameen*].

Le fait ki Allah Ta'ala li *Al-Wadoud* sa li exige de nous ki nous ena So l'amitié, ene l'amitiéki dépasse tout l'amitié, ene l'amitié ki ranne tout l'amitié fade et sans saveur, ene l'amitié ki control tout nous tendance et tout nous sentiments. C'est ene niveau de l'amitié ki faire difficultés vine facile, ki faire passe la nuit dans *Ibaadat* facile et délicieux, ki ranne bane pratiques rempli de sensation et jouissance vine détestable. Sa couleur là nous trouve li bien claire dans la vie de bane *Sahaba-e-Karaam*, bane *Tabe-ines*, *Tabe-Tabe-ines*, bane *Mujjadids*, bane Choisi d'Allah kot zot gagne sa couleur là en bon partie. Ena ene causer ki dire ki l'entourage ene dimoune li indique la personnalité de sa dimoune là. Et sa li bien vrai.

Rassoollullah (saws) fine dire ki ene dimoune li ena tendance reste dans la manière ki so camarade intime été. Reste dans l'entourage de bane personnages pieux li ene moyen très efficace pou transforme caractère et manière ene dimoune pour de bon.

Au contraire, c'est sa même le seul moyen. Donc, cotoiye bane personnage pieux li indispensable pour le développement de sa l'amitié là à ene degré et ene stage ki ranne tout kitchose secondaire devant l'amitié Allah Ta'ala et So Rassoollullah (saws). C'est ene l'amitié ki capave arrive à ene stage kot tout kitchose paraître insignifiant et dévaluer devant l'amour Allah Ta'ala jusqu'à donne la vie aussi [Ou donne ou la vie pou Allah et So Rassool – ou donne ou létemps, ou l'honneur et saki ou posséder pou Allah et So Rassool]. Non seulement li vine facile mais li vine délicieux.

Pour le moment li suffit pou dire seulement ceci, ki sans ki ou établi lien avec la vérité, bé ni ou capave gagne succès dans sa *duniya* là et ni dans lotte *duniya*. Li obligatoire ki nous émerger comme ene vrai Jamaat. Li meilleur ki nous dire ki tanque ki sak membre du Jamaat Ul Sahih Al Islam pas faire la vérité vine zot premier nature, bé ni nous capave gagne succès dans sa le monde là et ni dans lotte le monde. L'attribut de *Haqq* d'Allah profondément lier avec bane les autres attributs. Mo fine déjà explique ou au commencement de mo bane séries de Khutba lors sa sujet là et mo fine bien détailler lors attribut de *Haqq*.

Ki Allah donne nous bane capacités pour adopter sa, *Ameen Summa Ameen Ya Rabbul Aalameen*.

### COVID-19 ET QUARANTINE ACTS

Maintenant mo pou cause impé lors bane actualités de nous pays, surtout concernant nouvo « *Covid-19 et Quarantine Acts* » ki fine voter récemment.

Comme ene citoyen Mauricien, moi aussi mo ena a le droit pou dire quelques mots lors le « *Covid-19 Bill* » et la présentation du budget 2020-2021 ki pou ena lieu jeudi le 04 Juin 2020. Tous bane Mauriciens conne très bien le « *Covid-19 Bill* » et le « *Quarantine Bill* » parski tous sa ti au cœur de l'actualité de l'assemblée nationale.

Toutefois bane mesures ki fine présenter par le gouvernement pas paraitre ti à l'unanimité dans parlement et dans le pays. Moi personnellement mo trouver ki pas fine ena consultation ou dialogue avant zot présentation. Pourtant zot touche à la liberté de nous bane citoyens, à bane droits du travail, à bane réserves de la Banque centrale. Et le gouvernement d'après sa bane bills là capave servi bane fonds public sans transparence, gouvernance et sans rende compte de saki zot pé faire.

Le « *Covid-19 Bill* » comporte également la création de fond ki jamais vu auparavant et bane mesures draconien [extrêmes] ki affecter nous démocratie. Avec « *Covid-19 Act* » et « *Quarantine Act* », ena bane sanctions plus sévères.

Plusieurs articles de 56 la lois fine amendé sous « *Covid-19 (Miscellaneous provisions) Act* » et « *Quarantaine Act* », ki ti voté à l'assemblée nationale vendredi 15 Mai et ki fine vine officielle et en exécution le lendemain. De ce fait bane l'amendes et sentences de prison fine renforcé en cas d'infraction. En bref, mo mentionne quelques-z'uns :

- 1) **Chemical Fertilisers Control Act** passe de Rs. 1,000 à Rs. 10,000.
- 2) Crasser dans ene lieu public pou amène ene l'amende ki pas dépasse Rs. 5000 ou ene peine d'emprisonnement ki pas dépasse 30 jours.
- 3) **Environment Protection Act** : Pour l'élevage de bane volailles [couma poules etc.], [l'amende] passe de Rs. 5000 à Rs. 15,000.
- 4) Non respect de bane mesures sanitaires durant la période de couvre feu sanitaire, ene l'amende de Rs. 50,000 ou ene peine de prison de maximum deux ans.
- 5) Pou bane Pot-de-vin [Bribes], avant so l'amende ti Rs. 10,000 et astaire là Rs. 50,000 ou ene peine d'emprisonnement de 5 ans.
- 6) **Public Officers Protection Act** : Rs. 200,000 ou ene peine d'emprisonnement ki pas dépasse 5 ans.
- 7) **Light Rail Act** : Kot pou capave ena ene l'amende jusqu'à Rs. 1 million ou ene peine de prison jusqu'à 5 ans.
- 8) **Quarantine Act** : So l'amende pou capave alle jusqu'à Rs. 500,000 ou prison pou 5 ans.
- 9) **Public Health Act** : ene dimoune pou capave sanctionner avec ene l'amende de Rs. 200,000 ou 5 ans d'emprisonnement.

Mo pas capave cite tous. La liste trop longue. La situation pé dégrader de jour en jour. Certains secteurs couma Tourisme et Transport pou bien affecté. La Zone Franche Manufacturière ti déjà dans grand difficultés avant Covid-19 avec ene baisse de 10% dans dernier trimestre de 2019.

Sa secteur là risquer prend ene coup dure parski le comportement de bane acheteurs risquer changer après sa épidémie là. Moi personnellement, d'après mo analyse, le tourisme pas pou retourne à la normale d'ici 5 ans. Alors bizin expecte sa. Kan bane activités hôtellerie pou ré-prend, li pou opère à 30 ou 40% de so capacité. Certains groupes hôteliers pou probablement ouvert ene ou deux de zot bane l'hôtels.

Le secteur de la construction pas pou épargner par Coronavirus de même ki bane petits commerces et bane PME. Ena aussi faillite de Air Mauritius. Le chômage pou augmenter considérablement de même ki la pauvreté et bane inégalités. Des milliers de nous bane compatriotes pou perdi zot l'emploi ; bane les autres gagne bane « *leave* » d'absentéisme, bane longues congés sans la paye et beaucoup pou trouve zot bane salaires, bénéfices et droits réduire considérablement. Dans la panique, le gouvernement fine apporte soutien financier à bane entreprises ki pas mériter.

Au début de sa l'année là, Maurice fine passe de la liste blanche à la liste grise et aujourd'hui li lors la liste noire. C'est ene coup terrible pour sa secteur là. Plusieurs cas fine noirci nous l'image. D'après l'Union Européenne et **Financial Action Task Force** ena beaucoup de bane activités, sociétés et produits ki représente bane risques de blanchiment. Bizin élimine zot ene fois pour toute afin ki nous capave sorti pour ene longue lé temps de sa la liste noire là.

Le Premier Ministre Pravind Jugnauth fine annoncé ki le budget 2020-2021 pou présenter le 04 Juin prochain. Alors le Ministre des Finances, Renganaden Padayachy ena beaucoup travail à faire vu sa conjoncture ki ena là. Bane personnalités tel ki bane leader politiques, économistes, bane syndicats [syndicalistes] et aussi beaucoup de bane citoyens zot pé dire ki faudé pas commette bane erreurs pou endette davantage la population avec le budget 2020-2021 ki pou présenter le 04 Juin prochain.

Pour moi, nous dans ene situation d'urgence économique et sociale. Nous bizin donc ene Budget ki capave aider pou rémette l'Économie à flot. Le Budget 2020-2021 bizin inclure ene plan social afin pou vine en aide à bane dimounes ki au bas de l'échelle. C'est la priorité de bane priorités. L'autre priorité du gouvernement ti bizin focus [concentrer] lors préservation de bane l'emplois. Moi aussi mo dire ki l'erreur à éviter c'est justement pou pas répète l'erreur pour ene mauvais gestion et ene opacité dans bane dépenses [kot pas ena aucaine transparence]. Alors bizin ena transparence.

Mo bien peur ki le gouvernement pas succombe ene fois de plus à bane lobbies du secteur privé en présentant ene budget ki pèze lizié à bane gros capital [bane capitalistes] et ki pas apporte assez de soutien à bane dimounes ki travail pou zot propre compte [bane self-employed] et à bane dimounes vulnérables.

Ena ene certain la peur [crainte] ki fine installée. Li pou difficile pour le gouvernement pou regagne la confiance de la population ki fine couler [kot la population népli ena confiance dans sa gouvernement là maintenant].

Donc, li important ki le gouvernement réfléchi lors bane secteurs ki capave être développé pour permette au pays pou relever. Mo propose la production locale de certains bane produits de base alimentaires. Ene telle initiative non seulement pou favorise la création de bane l'emplois mais li pou permette aussi pou génère bane revenus. Ena pas moins de 10,000 hectares de terrains [capave même plisse] ki abandonné et ki reparti à travers le pays. Le gouvernement bizin vine avec ene projet global visant à encourage l'utilisation de sa bane la terres là. Capave cultive bane produits alimentaires de base là-dans. Nous dans ene situation différent maintenant. **Arise and Create a New World** [*Lever et Créer ene Nouvo Monde*].

Kan mo guetter maintenant, mo trouver ki bane kitchoses ki mo fine dire avant, maintenant bane dimounes d'accord avec saki mo fine dire [certains dimounes, pas tout]. Kan mo ti gagne sa révélation là et mo fine dire ki Allah fine révèle moi sa, alors mo ti dire zot pou prépare zot pour deboute et créer ene nouvo monde. Ena ki ti faire la sourde d'oreille et bane les autres fine ridiculise moi ki mo ene dimoune fou, ki mo bizin alle Brown Sequard.

C'est ene révélation ki fine recevoir en l'an 2008 à 2009, et aussi 2010 à plusieurs reprises. Aujourd'hui, bane dimounes fine vine fou avec Covid-19. Nous dans ene situation différent. Ene nouvo monde fine prend place. Nous la vie jamais pas pou vine la même ki avant. Bane citoyens du monde entier fine maintenant être appeler pou change zot mode de vie.

Ki Allah aide tous So bane serviteurs croyants et l'humanité dans so l'ensemble dans sa nouvo mode de vie [sa nouvo monde] là. Ki Allah soulage la douleur de bane pauvres, de bane ki dans le grand besoin, bane ki fine perdi zot bane travaux, ki ena zot la famille pou nourri, bane ki ena dettes – à commencer par nous ti l'île Maurice même, et alle dans profond de bane pays de sa le monde là aussi. Ki Allah aide nous pou remette nous deboute [Nous bizin lire So bane attributs], et ki avec bonne foi, bonne volonté et coopération nous marche vers ene l'île Maurice et ene le monde meilleur. *Insha-Allah, Ameen.*